

Fu posto, per i savii, atento sier Anzolo Malipiero è retor e provedador a Cataro, debitor di tanxe ducati . . . , per il qual debito l' officio di le cazude li vol vender una caxa; e perchè dito sier Anzolo è creditor per conto di nave di la Signoria di assa' summa di danari, da mò sia preso e suspeso dito debito fino el vengi di qui, *ut in parte*. Fo batolata do volte et fu presa.

107. *Capitolo de una letera scrive sier Lorenzo Pasqualigo, dada a Londra a dì 23 Marzo 1513, drizata a sier Alvixe e Francesco Pasqualigo qu. sier Filippo so' fradeli, ricevuta a dì primo Mazo in questa terra.*

La Maestà de sto Re à mandà fora nave 70 con persone 20 milia in tutto forte e ben in ordene che 'l se farà signor del mar, e tegno che francesi non li basterà l'animo de ussir fora; che ussendo costoro, li daria el malanno, perchè cussi sono usi a farlo. Poi Sua Maestà dize de pasar sto Mazo con tanta posanza quanta fosse mai in sì de li altri Re, e con tanta pompa e con tanto spender denari che non li manca, che non vedesti mai tal cosa. Et oltre li suo' inglexi, averà lanzchenet numero 10 milia e zente d' arme a cavallo del paexe de Enavit e d' Alemagna, che sono in camino; e fa tante provixion per sta guera e belle, chè l' è una maraveglia; e se dize che lui anderà a la volta de Paris. Idio fazi quello sia el mejo, e per zornata sentireti assai cose che ve ne darò aviso. Per l' amor de Dio, io ve ò scritto tante volte che dizeti a la Illustrissima Signoria che scrivi una bona letera a Sua Maestà, che la dexidera; e vui mi rispondereti che la farà, *tamen* non fano nulla, e ogni zorno ne son dimandado se ò letere, e non so che risponder. *Etiam* el nostro ambador non à letere, che pur l' è una gran cosa; che se Sua Maestà o qualcheuno del suo Conseio mi dimanda di qualcosa, non sapiamo che risponderli; non so a che dar la colpa se non a non far caxo de ste cose de qui. Per zerto el ne poria tornar danno; che posendo tenirselo amico con carta senza altra spexa el non volemo; non so che dirmi; e non ve ne dirò più altro di questo. Sono savii, fazano loro e tanto basta.

*Di Salò, di 30 April, vidi letere.* Come conferma quanto si ave aviso per avanti, che mandando il provedador zeneral fanti 50 per la roca di Anfo, essendo zonti a Ponte se lassono tristamente condur a certi villani con parole a Verona che podevano tajar la cadena et pasar di longo, perchè quel loco non

feva 25 persone; *unde* esso provedador, per custodia di Anfo, messe li alcune zente paesane mal pratiche, et i nimici preparano assa' persone di anni 18 fin 60 e vol venir per quel passo e intrar in Brexa e su la Riviera di Salò, e far danni. Per tanto dimanda li sia mandà un contestabile con 400 fanti, e cussi ha scritto in campo al provedador. *Item*, à ricordà saria bon tuor il passo di Valezo per esser sora tutti li altri passi; qual non tolendo, non potranno più seriver letere a la Signoria. *Unum est*, i nimici fanno gran preparation di zente. *Etiam* si ha, el marchexe di Mantoa ha mandato zente a Gedi e tutti altri soi passi.

*Sumario de una letera di sier Andrea Gritti 108 procurator, data a Bles, a dì 20 April 1513, drizata a suo fratello sier Polo Malipiero.*

Son certo, per le publice intenderai la expeditione nostra per Italia; e per non far altra replich, altro non te dirò salvo che questa Maestà regia fa verso di me dimostrazione tanto grande, che non è persona in questa corte non se stupisca. Quando de qui zonse monsignor de la Trimolia, el qual à esser capitano de questa impresa con el signor Zuan Giacomo, subito el volse mi ritrovase con sua signoria et insieme andasemo da la Maestà regia; et fu per Sua Maestà comandato che mi dovese ritrovar in tutti i consulti e deliberazion de questa impresa de Italia. E in quella medema ora, con i deputati ad questo Consiglio se redusesemo in una camera, et discorso tra nui quel se avea a far per exequir la impresa per le preparazion fate per inanti, e non se partisemo de li che tutto fu deliberato, per modo che ritornati dal Re e fatoli intender el tutto, per Sua Maestà azonto e sminuito quele cosse li parse, fu poi messo bon ordine a tutto, e fu ordinato per la expeditione come se convien et spazato letere e capetani da pe' e da cavallo che sono andati a le sue compagnie, e tute altre cosse necessarie per la guera. Et fato questo, la Maestà del Re, presente monsignor de la Tremuglia et quelli del suo Consejo, se voltò verso di me, et disse queste formal parole « Missier Andrea, io vi vedo volentiera qui apresso de mi per consigliarme con voi de le cosse de Italia come el plui pratico che si trovi; ma considerando che qui non me poso servir de vui salvo de questo, el bisogna che in servizio mio e de la vostra Illustrissima Signoria andate ne l' exercito mio azio de voi se possiamo servir de consejo e de fatti, e però è neces-